



册府元龜
卷之百八十七
至九



1 3
849
65



849
65



冊府元龜

淮南李嗣京參閱

西極文翔鳳訂正

豫章黃國琦較釋

閏位部 六

勲業第五

梁太祖神武元聖孝皇帝宋州碭山縣人也未冠而孤母王氏携養寄於蕭縣人劉崇之家帝既壯以雄勇自負唐僖宗乾符中關東薦饑羣賊嘯聚黃巢因之起於曹濮饑民願附者凡數萬帝乃辭崇家與仲

凡存俱入巢軍以力戰屢捷得補爲隊長唐廣明元年十二月甲申黃巢陷長安遣帝領兵屯於東渭橋是時夏州節度使諸葛爽率所部屯于櫟陽巢命帝招諭爽爽遂降於巢中和二年二月巢以帝爲東南面行營先鋒使令攻南陽下之六月帝歸長安巢親勞於灊上七月巢遣帝西拒邠岐鄜夏之師於興平所至皆立功二年二月巢以帝爲同州防禦使使自攻取帝乃自丹州南行以擊左馮振之遂據其郡時河中節度使王重榮屯兵數萬糾合諸侯以圖興復帝時與之鄰封屢爲重榮所敗遂請濟師於巢表章

十上爲僞軍使孟楷所蔽不達又聞巢軍勢蹙離心帝知其必敗九月帝遂與左右定計斬僞監軍使嚴貴舉郡降於重榮重榮卽日飛章上奏時僖宗在蜀覽表而喜曰是天賜予也乃詔授帝左金吾衛大將軍充河中行營副招討使仍賜名全忠自是帥所部與河中兵士偕行所向無不克捷三年三月僖宗制授帝宣武軍節度使依前充河中行營副招討使仍令候收復京闕卽得赴鎮四月巢軍自藍關南走帝與諸侯之帥俱收長安乃率部下二旅之衆使節東下七月丁卯入於梁苑是時帝年二十有二時

蔡州刺史秦宗權與黃巢餘孽合從肆虐共圍陳州
久之僖宗乃命帝爲東北面都招討使時汴宋連年
阻饑公私俱困帑廩皆虛外爲大敵所攻內則驕軍
難制交鋒接戰日甚一日人皆危之惟帝銳氣益振
是歲十二月帝領兵於鹿邑與巢衆相遇縱兵擊之
斬首二千餘級乃引兵入亳州因是兼有譙郡之地
四年春帝與許州田從異下諸軍同收瓦子寨殺賊
數萬衆是時陳州四面賊寨相望驅虜編氓殺以充
食號爲春磨寨帝分兵翦撲大小凡四十戰四月丁
巳收西華寨賊將黃鄴單騎奔陳帝乘勝追之鼓噪

而進會黃巢遁去遂入陳州刺史趙犖迎於馬前俄
聞巢黨尚在陳北故陽壘帝遂逕歸大梁是時河東
節度使李克用奉僖宗詔統騎軍數千同謀破賊與
帝合勢於中牟北邀擊之賊衆大敗於王滿渡多束
手來降時賊將霍存葛從周張歸厚張歸霸皆匍匐
於馬前悉宥而納之遂逐殘寇東至於宛旬五月甲
戌帝與晉軍振旅歸汴館克用於上源驛旣而備犒
宴之禮克用乘醉任氣帝不平之是夜命甲士圍而
攻之會大雨雷電克用因得於電光中踰垣遁去惟
殺其部下數百人而已六月陳人感解圍之惠爲帝

建生祠堂於其郡是歲黃巢雖沒而蔡州秦宗權繼
爲巨孽有衆數萬攻陷鄰郡殺掠吏民屠害之酷更
甚巢賊帝患之七月遂與陳人共攻蔡賊於澗水殺
數千人九月己未僖宗就加帝檢校司徒同平章事
封潼郡侯食邑千戶光啓元年春蔡賊掠亳潁二郡
帝帥師以救之遂東至於焦夷敗賊衆數千生擒賊
將殷鐵林梟首以徇于軍而還三月僖宗自蜀還長
安改元光啓四月戊辰就加帝檢校太保增食邑千
五百戶十二月河中太原之師逼長安觀軍容使用
令致奉僖宗出幸鳳翔二年春蔡賊益熾時唐室微

弱諸道州兵不爲王室所用故宗權得以繼
汝洛懷孟唐鄧許鄭圍幅數千里殆絕人煙惟宋毫
滑潁僅能閉壘而已帝累出兵與之交戰然或勝或
負人甚危之三月庚辰僖宗降制就封帝爲沛郡王
是月僖宗移幸興元五年嗣襄王溫僭卽帝位於長
安改元爲建貞遣使齎僞詔至汴帝命焚之于庭未
幾襄王果敗七月蔡人逼司州節度使鹿宴弘使來
求救帝遣葛從周等率師赴援師未至而城陷宴弘
爲蔡賊所害十一月滑州節度使安師儒以怠於軍
政爲部下所殺帝聞之乃遣朱珍李唐實襲而取之

由是遂有滑臺之地十二月僖宗降制就加帝檢校太傅改封吳興郡王食邑三千戶是歲鄭州爲蔡賊所陷刺史李璠單騎來奔帝宥而納之以爲行軍司馬宗權旣得鄭益驕帝遣裨將邏於金隄驛與賊相遇因擊之賊衆大敗追至武陽橋斬首千餘級帝每與蔡人戰於四郊旣以少擊衆常出奇以制之但患師少未快其旨宗權又以已衆十倍於帝恥於頻敗乃誓衆堅決以攻夷門旣而獲蔡之謀者備知其事遂謀濟師焉三年春二月乙巳承制以朱珍爲淄州刺史俾募兵於東道且慮蔡人暴其麥苗期以夏首

回歸珍旣至淄掾旬日之內應募者萬餘人又潛襲青州獲馬千匹鎧甲稱是乃鼓行而歸四月辛亥達於夷門帝喜曰吾事濟矣是時賊將張晁屯於北郊秦賢屯於版橋各有衆數萬樹柵相連二十餘里其勢甚盛帝謂諸將曰此賊方今息師蓄銳俟其時必來攻我况宗權度吾兵少又未知珍來謂吾畏懼止於堅守而已今出不意不如先擊之乃親引兵攻秦賢寨將士踊躍爭先賊果不備連拔四寨斬首萬餘級時賊衆以爲神助庚午賊將盧塘領萬餘人於圃田北萬勝戍夾汴水爲營跨河爲梁以扼運賂帝擇

精銳以襲之是日昏霧四合兵及賊壘方覺遂突入掩殺赴水死者甚衆盧塘自投于河河南諸賊連敗不敢復駐皆併在張晁寨自是蔡寇皆懷震讐往往軍中自相驚亂帝旋師休息大行犒賞繇是軍士各懷憤激每遇敵無不奮勇五月丙子出酸棗門自卯至未短兵相接賊衆大敗追斬二十餘里僵仆相枕宗權恥敗益縱其虐乃自鄭州親領突將數人徑入張晁寨其日晚大星殞於賊壘有聲如雷辛巳兗鄆滑軍士皆來赴援乃陳兵於汴水之上旌旗器甲甚盛蔡人望之不敢出寨翼日分布諸軍齊攻賊寨自

寅至申斬首二萬餘級會夜收軍獲生馬輜重生日器甲不可勝計是夜宗權晁遁去遲明追之至陽武橋而還宗權至鄭州乃盡焚其廬舍屠其郡人而去始蔡人分兵寇陝雒孟懷許汝皆先據之因是敗也賊衆恐懼咸棄之而遁帝乃慎選將佐俾完緝壁壘爲戰守之備於是遠近流亡復歸者衆矣是時揚州節度使高駢爲裨將畢師鐸所害復有孫儒楊行密互相攻伐朝廷不能制乃就加帝簡較太尉兼領淮南節度使九月亳州裨將謝殷逐刺史宋衮自據其郡帝親領軍屯於太清宮遣霍存討平之帝之禦蔡

寇也鄆州朱瑄兗州朱瑾皆領兵來援及宗權旣敗
帝以瑄瑾宗人也又有力於已皆厚禮以歸之瑄瑾
以帝軍士勇悍私心愛之乃密於曹濮界上縣金帛
以誘之帝軍利其貨而赴者甚衆帝乃移檄以讓之
自朱瑄來詞不遜乃命朱珍侵曹伐濮以懲其姦木
幾珍伐曹州執刺史丘禮以獻遂移兵圍濮兗鄆之
釁自茲而始矣十月僖宗命水部郎中王贊撰紀功
碑以賜帝是月帝親騎數千巡師於濮上因破朱瑄
援軍於范縣丁未攻陷濮州刺史朱裕單騎奔鄆尋
爲鄆人所敗踰月乃還十二月僖宗遣使賜帝鐵券

又命翰林承旨劉崇望撰德政碑以賜帝閏月甲寅
帝請行軍司馬李璠權知淮南留後乃遣大將郭言
領兵援送以赴楊州文德元年正月帝率師東赴淮
海行次宋州聞揚行密已拔揚州遂還是時李璠郭
言行至淮上爲徐戎所拒不克進而還帝怒遂謀伐
徐二月丙戌僖宗制以帝爲蔡州四面行營都統繇
是諸鎮之師皆受帝之制度三月庚子昭宗卽位是
月蔡人石璠領萬衆以剽陳亳帝遣朱珍率精騎數
千擒璠以獻四月戊辰魏博樂彥禎失律其子從訓
出奔相州使來乞師帝遣朱珍領上軍濟河連收黎

陽臨河二邑既而魏軍推小較羅弘信爲帥弘信既立遣使送款於汴帝優而納之遂命班師是月河南尹張全義襲李罕之於河陽克之罕之單騎出奔因乞師於太原李克用爲發萬騎以援之罕之遂收其餘衆與晉軍合勢急攻河陽全義危急遣使求救於汴帝遣丁會牛存節葛從周領兵赴之大戰於溫縣晉人與罕之俱敗於是河橋解圍全義歸於河陽因以丁會爲河陽留後五月己亥昭宗制以帝簡較侍中增食邑三千戶戊辰詔改帝鄉曰衣錦鄉里曰汴王里是月帝以兼有洛孟之地無西顧之患將夫整師

徒畢力誅蔡會蔡人趙德諱舉漢南之地以歸於朝廷且遣使送款於帝仍誓戮力同討宗權帝表其事朝廷因以德諱爲蔡州四面副都統又以河陽保義義昌三節度爲帝行軍司馬兼糧科應接使至是帝領諸侯之師會德諱以伐蔡敗蔡賊於汝水之上遂傳其城五日之內樹二十八寨以環之蓋象列宿之數也時帝親臨矢石一日飛矢中其左腋血漬單衣顧謂左右曰勿洩九月以糧運不繼遂班師是時帝知宗權殘孽不足爲患遂移兵以伐徐十月先遣朱珍領兵與時溥戰於吳康鎮徐大敗連收豐蕭二

邑溥携散騎馳入彭門帝命分兵以攻宿州刺史張友携符印以降既而徐人閉壁堅守遂命龐師古屯兵守之而還是月蔡賊孫儒攻陷揚州自稱淮南節度使龍紀元年正月龐師古攻下宿遷縣進軍於呂梁時溥領軍二萬晨壓師古之軍而陣師古促戰敗之斬首二千餘級溥復入於彭門二月蔡將申叢遣使來告縛秦宗權於帳下折其足而囚之矣帝即日承制以叢爲淮西留後未幾叢復爲都將郭璠所殺是月璠執宗權來獻帝遣行軍司馬李璠牙較朱克讓檻進於長安既至昭宗御延喜樓受俘卽斬宗權

於獨柳樹下蔡州平昭宗詔加帝食實封一百戶賜莊宅各一區三月又加帝簡較大尉兼中書令進封東平王賞平蔡之功也大順元年四月丙辰宿州小將張筠逐刺史張紹光擁衆以朋時溥帝率親軍討之殺千餘人筠遂堅守乙卯時溥出兵暴碭山縣帝遣朱友裕以兵襲之敗徐軍三千餘衆獲沙隨援軍石君和等三十人斬於宿州城下六月辛酉淮南孫儒遣使脩好於帝帝表其事請以淮南節度授于儒焉辛未昭宗命帝爲宣義軍節度使充河東東面行營招討使時朝廷宰臣張濬將兵討太原故也八月甲寅

昭義都將馮霸殺沙陁所署節度使李克恭來降帝請河陽節度使朱崇節爲潞州留後戊辰李克用自率蕃漢出騎數萬以圍潞州帝遣葛從周率驍勇之士夜中啣枚犯圍而入於潞九月壬寅帝至河陽遣都將李讜引軍趨渾潞行至馬牢川爲晉人所敗帝又遣朱友裕張全義率精兵至渾州北以爲應援旣而崇節從周棄潞來歸戊申帝廷責諸將敗軍之罪斬李讜李重裔以徇遂班師焉十月乙酉帝自河陽赴滑臺時奉詔將討太原先遣使假道于魏魏人不從先是帝遣行人雷鄴告羅于魏旣而爲牙軍所殺

羅弘信懼故不敢從命遂通好於太原十二月辛丑帝遣丁會葛從周率衆渡河取黎陽臨河又令龐師古霍存下淇門衛縣帝徐以大軍繼其後二年春正月魏軍屯於內黃丙辰帝與之接戰自內黃至永定橋魏軍五敗斬首萬餘級羅弘信懼遣使持厚幣請和帝命止其焚掠而歸其俘弘信繇是感悅而聽命焉乃收軍屯於河上八月己丑帝遣丁會急攻宿州刺史張筠堅守其壁會乃率衆於州東築堰壅汴水以浸其城十月壬午筠遂降宿州平十一月丁未曹州裨將郭紹賓殺刺史郭饒舉郡來降是月徐將劉

知俊率衆二千來降自是徐軍不振十二月兗州朱瑾領軍三萬寇單父帝遣丁會領大軍襲之敗於金鄉界殺二萬餘衆瑾單馮遁去景福元年正月遣丁會於兗州界徙其民數千戶於許州二月戊寅帝親征鄆先遣朱友裕屯軍於斗門甲申次衛南有飛鳥止於峻堞之上鳴噪甚厲副使李璠曰將有不如意之事是夜鄆州朱瑄率步騎萬人襲朱友裕於斗門友裕拔軍南去乙酉帝晨救斗門不知友裕之退前至斗門者皆爲鄆人所殺帝追襲鄆至瓠河不及遂領兵於村落間時朱瑄尚在濮州丁亥遇朱瑄率兵

前歸於鄆遂來衝擊帝策馬南馳爲賊所追甚急前有浚溝躍馬而過張歸厚援稍力戰於其後乃免時李璠與都將數人皆爲鄆軍所殺五月丙午遣朱克讓率衆暴兗鄆之麥十一月遣朱友裕率兵攻濮州下之擒刺史邵儒以獻濮州平遂命移軍伐徐州二年八月帝遣龐師古移兵攻兗駐於曲阜與朱瑾屢戰皆敗之十二月師古遣先鋒葛從周引軍以攻齊州刺史朱威告急于兗鄆旣而朱瑄以援兵至遂固其壘乾寧元年二月帝親領大軍繇鄆州東路北次於魚山朱瑄覬知卽以兵徑至且圖速戰帝整軍出

寨時瑄瑾已陣於前須臾東南風大起帝軍旌旗失次甚懼失色帝卽令騎士揚鞭呼嘯俄而西北風驟發時兩軍皆在草莽中帝因令縱火而煙燄亘天乘勢以攻賊陣瑄瑾大敗殺萬餘人餘衆擁入清河因築京觀於魚山之下駐軍數日而還二年正月癸亥遣朱友恭帥師復伐兗遂塹而圍之未幾朱瑄自鄆率步騎援糧欲入于兗友恭設伏以敗之盡奪其餉於高吳因擒蕃將安福順安福慶二月己酉帝領親軍屯於單父以爲友恭之援四月濠壽二州復爲楊行密所陷是時太原遣將朱巖兒李承嗣以萬騎馳

入於鄆朱友恭遂歸於汴八月帝領親軍伐鄆至大仇遣前軍挑戰設伏於梁山以待之旣而獲蕃將史完府奪馬數百匹朱瑄脫身遁去復入於鄆十月帝駐軍於鄆齊州刺史朱瓊遣使請降瓊卽瑾之從父兄也帝因移軍至兗瓊果來降未幾瓊爲朱瑾所給而殺之帝卽以其弟玘爲齊州防禦使十一月朱瑄復遣將賀環柳存及蕃將何懷寶等萬餘人以襲曹州庶解兗州之圍也帝知之自兗領軍策馬先路至鉅野南追而敗之殺戮將盡生擒賀環柳存何懷寶及賊黨三千餘人是日申時狂風暴起塵沙沸湧

曰此乃殺人未足耳遂下令盡殺所獲囚俘風亦止焉翼日繫賀環等以示于兗帝素知環名乃釋之惟斬何懷寶於兗城之下乃班師十二月葛從周領兵復伐兗既至與朱瑾戰於壘下殺千餘衆擒其將孫漢筠已下二十人遂旋師三年正月河東李克用既破邠州欲謀爭霸乃遣蕃將張污落以萬騎塞於河北之莘縣聲言欲救兗鄆魏博節度使羅弘信患之使來求援四月辛酉河東泛漲將壞滑城帝令決隄岸以分其勢爲二河夾滑城而東爲害滋甚是月帝遣許州刺史朱友恭領兵萬人渡淮以便宜從事

爲洪鄂二州累遣使求援故有是行五月命葛從周統軍屯于洹水以備蕃軍六月李克用帥蕃漢諸軍營于斥丘遣其男落落將鐵林小兒三千騎薄於洹水從周與戰大敗之生擒落落以獻克用悲駭請修舊好以贖其子帝不許遂執落落送于羅弘信斬之越七日我軍還屯湯畱以伐鄆八月復壁於洹水是時昭宗幸華州遣使就加帝簡較太師守中書令四年正月帝以洹水之師大舉伐鄆辛卯營于濟水之次龐師古令諸將撤木爲橋乙未夜師古以中軍先濟聲振于鄆朱瑄聞之棄壁夜走葛從周逐之至中

都北擒瑄并其妻男以獻尋斬汴橋下鄆州平乙亥
帝入於鄆以朱友裕爲鄆州兵馬留後時帝聞朱瑾
與朱儼兒在豐沛間搜索糧饋惟留康懷英以守兗
州帝因乘勝遣葛從周以大軍襲兗懷英聞鄆失守
俄又我軍大至乃出降朱瑾朱儼兒遂奔淮南兗海
沂密等州并平乃以葛從周爲兗州留後八月陝州
節度使王珙遣使來乞師是時珙弟琦實爲蒲師迭
相憤怒日尋干戈而珙兵寡故來求援帝遣張存敬
楊師厚等領兵赴陝旣而與蒲人戰于猗氏大敗之
九月帝以兗鄆旣平將士雄勇遂大舉南征命龐師

古以徐宿宋滑之師趨清口葛從周以兗鄆曹濮
之衆徑赴安豐淮人遣朱瑾領兵以拒師古因決水
以浸軍遂爲淮人所敗師古歿焉葛從周行及濠梁
聞師古之敗亦命班師光化元年正月帝遣葛從周
統諸將畧地於山東遂次于邢洛三月昭宗以帝兼
領天平軍節度使餘如故四月滄州節度使盧廷彥
爲燕軍所攻棄城奔于魏魏人送于汴是月帝以大
軍至鉅鹿屯於城下敗晉軍萬餘衆於青山口俘馬
千餘匹丁卯遣從周分兵攻洛州斬刺史邢善益擒
將五十餘人五月己巳邢州刺史馬師素棄城遁去

辛未惠州刺史袁奉滔自剄而死五日之內連下三州因以葛從周兼邢州昭義軍節度留後帝遂班師是時襄州節度使趙凝聞帝軍有清口之敗密附於淮夷七月帝遣氏叔琮率師伐之未幾其泌州刺史趙璠越墉來降隨州刺史趙琳臨陣就擒二年正月淮南楊行密舉全吳之衆精甲五萬以伐徐州帝領大軍禦之行密聞帝親征乃收軍而退時幽州節度使劉仁恭大舉蕃漢兵號十萬以伐魏遂攻陷貝州州民萬餘戶無少長悉屠之進攻魏州魏人來乞師帝遣朱友倫張存敬李思安等先屯于內黃帝遂親征三月與燕軍戰于內黃北燕軍大敗殺二萬餘衆奪馬二千餘匹擒都將單無敵已下七十餘人是月葛從周自山東領其部衆馳以救魏翼日乘勝諸將張存敬已下連破八寨遂逐燕軍北至於臨清擁其殘寇於御河溺死者甚衆仁恭奔於滄州六月帝表丁會爲潞州節度使以李罕之疾亟故也又遣葛從周繇固鎮路入于潞州以援丁會七月壬辰朔海陳漢賓擁所部三千奔于淮南戊戌晉人陷澤州帝遣召葛從周於潞留賀德倫以守之未幾德倫爲晉人所逼遂棄潞而歸繇是潞州復爲晉人所有十一月

十五

陝州都將朱簡殺留後李璠自稱留後送款于帝三年
四月遣葛從周以充鄆滑魏之師伐滄州五月庚寅
攻德州拔之梟刺史傅公和於城上巳亥進攻浮陽
六月燕師劉仁恭大舉來援從周與諸將逆戰于乾
寧軍老鴉隄大破之殺萬餘衆俘其將佐馬慎交已
下百餘人旣而以連雨遂班師八月河東遣李進通
襲滔洛州執刺史朱紹宗帝遣葛從周自鄴縣渡漳
水屯于黃龍鎮親領中軍涉洛而寨晉人懼而宵遁
洛州復平九月帝以仁恭進通之入寇也皆繇鎮定
爲其囊橐卽以葛從周爲上將以伐鎮州遂攻下臨

城渡滹沱以環其城帝領親軍繼至鎮帥王鎔懼納
質請盟仍獻文縉二十萬以犒戎士帝許之十月晉
人以帝宿兵於趙遂南下大行急攻河陽留後侯言
與都將閻寶力戰固守僅而獲全十一月以張存敬
爲上將自甘陵發軍北侵幽薊連拔瀛莫二郡遂移
軍以攻中山定帥王郜以精甲二萬戰于懷德亭盡
殪之郜懼奔于太原遲明大軍集于城下郜季父處
直持印鑰乞降亦以縉帛三十萬爲獻帝卽以處直
代郜領其鎮焉是月燕人劉守光赴援中山寨于易
水之上繼爲康懷英張存敬等所敗斬獲甚衆繇是

河朔知懼皆弭伏焉是歲唐佐軍中尉劉季述幽昭宗於東宮內立皇子德王裕爲帝仍遣其養子希度來言願以唐之神器輸於帝時帝方在河朔聞之遽還于汴大計未決會李振自長安使廻因言於帝曰夫豎刁伊戾之亂所以資霸者之事也今闞豎幽辱天子王不能討無以令諸侯帝悟因請振復使于長安與時宰潛謀反正天復元年正月乙酉朔唐宰相崔喬潛使人以帝密旨告於侍衛軍將孫德昭已下令誅左右中尉劉季述王仲先等卽時迎昭宗於東內御樓反正癸巳降制進封帝爲梁主酬反正之功

也昭宗之廢也汴之邸吏程巖牽昭宗衣下殿帝聞之召巖至汴折其足送于長安杖殺之是時河中節度使王珂結援於太原帝怒遣大將張存敬率將泚河繇倉山路鼓行而進戊申攻下絳州壬子晉州刺史張漢瑜舉郡來降帝卽以大將侯言權領晉州何綰權領絳州晉絳平巳未大軍至河中存敬命繚其垣而攻之壬戌蒲人颺素幡以請降庚午帝至河中以張存敬權領河中軍府事河中平帝乃東遷是月李克用遣牙將張特來聘請尋舊好帝亦遣使報命三月癸未朔帝歸自河中是月遣大將賀德倫氏叔琮

領大軍以伐太原叔琮等自太行路入魏博都將張文恭自磁州新口入葛從周以兗鄆之衆自土門路入洺州刺史張歸厚以本軍自馬嶺入定州刺史以本軍自飛狐入晉州侯言自陰地入澤州刺史李存璋棄郡奔歸太原叔琮引軍逼潞州節度使遷乞降河東屯將李審建王周領步軍一萬騎二千詣叔琮歸命乃進軍趨太原四月乙卯大軍出石會關營於洞渦驛都將白奉國自井陘入收承天軍張歸厚引兵至遼州刺史張鄂逃降氏叔琮日與諸軍至陽城下城中雖時出精騎來戰然危蹙至甚將謀遁矣會叔琮

以芻糧不給遂班師五月癸卯昭宗以帝兼領護國軍節度使河中尹六月庚申帝發自大梁丁卯視事於河中七月甲寅帝東還梁邸十月戊戌奉密詔赴長安是時朝廷旣誅劉季述以韓全誨張弘彥爲兩軍中尉袁易簡周敬容爲樞密使是時軍國大政專委宰相崔胤每事裁抑宦官宦官側目崔一日於便殿奏欲盡去之全誨等屬垣聞之嘗於昭宗前祈哀自訴自是昭宗勅崔每有密奏令進囊封全誨等乃訪京城美婦人十數以進使求宮中陰事昭宗不悟崔謀漸泄中官視崔皆裂以重賂甘言誘藩臣以爲

城社時因讌聚則相向流涕時崔掌三司貨泉全誨等教禁兵伺崔出聚而呼譟訴以冬衣減損又於昭宗前訴之昭宗不得已罷崔知政事崔怒急召帝請以兵入輔故有是行戊申行次河中同州留後司馬鄴華之幕吏也舉郡來降辛亥駐軍於渭濱華師韓建遣使奉牋納款又以銀三萬兩助軍是日行次零口癸丑聞長安亂昭宗爲闈官韓全誨等劫遷西幸鳳翔蓋避帝之兵鋒也翼日遂命旋師夕次于赤水乙卯大軍集于華州下城韓建惶駭失措卽以城降丙辰帝表建權知忠武軍事促令赴任同華二州平是時唐

太子太師盧知猷等二百六十三人列狀請帝速請迎奉己未遂帥諸軍發自赤水壬戌次于咸陽偵者云天子昨暮至岐山旦日宋文通扈蹕入其闈矣是時岐人遣大將符道昭領兵萬人屯於武功以拒帝帝遣唐懷英敗之虜甲士六千餘衆乙丑次于岐山文帝遣使奉書自陳其失請帝入覲丙辰及岐闈文通渝約閉壁不獲通復次于岐山是時昭宗累遣使齎朱書御札賜帝遣帝收軍速還本道帝診之曰此必文通全誨之謀也皆不奉詔癸酉飛章奉辭且移軍北伐乙亥至邠州節度使李繼徽舉城降繼徽因

請去文通所賜李姓復本宗楊氏又請納其帑以爲質帝皆從之仍易其名曰崇本邠州平巳丑唐丞相崔喬京兆尹鄭元規至華州以速迎奉爲請許之二年正月帝復次於武功岐人堅壁不下乃廻軍於河中二月聞晉軍大舉南下聲言來援鳳翔帝遣朱友寧帥師會晉州刺史氏叔琮以禦之帝以大軍繼其後三月友寧叔琮與晉軍戰于晉州之北大敗之生擒克用男廷鸞帝喜謂左右曰此岐人之所恃也今旣如此岐之變不久矣四月岐人遣符道昭領大軍屯于號縣康懷帥驍騎敗之丁酉唐丞相崔喬自華

來謁帝屢述艱運危急事不可緩又慮羣閹擁昭宗幸蜀且告帝爲之動容崔將辭啓宴于府署帝舉酒崔情激於哀因自持樂版聲曲以侑酒帝甚悅座中以良馬珍玩賚之旣行命諸將繕戎具五月丁巳帝復西征六月丁丑次於號縣癸未與岐軍大戰自辰至午殺萬餘衆擒其將校數百人乘勝遂逼其壘七月丙午岐軍復出求戰帝軍不利是月遣孔勅帥師取鳳隴城三州皆下之是時岐人相率結寨於諸山以避帝軍帝分兵以討之浹旬之內竝平之九月甲戌帝以岐軍諸寨聯結稍盛因親統千騎登高診之

是時帝以岐人堅壁不戰且慮師老思欲旋旆以歸河中因密召上將數人語其事時親從指揮使高季昌獨削出抗言曰天下雄傑窺此舉者一歲矣今岐人已困願少俟之帝嘉其言因曰兵法以正理以奇勝奇者詐也乘機集事必由是乎乃命季昌密募人入岐以給之尋有騎士馬景堅願應命且曰是行也必無生理願戮其孥帝悽然止其行景固請乃許之明日軍出諸寨屏匿如無人景因躍馬西走直叩岐圍詐以軍怨東遁爲告且言列寨尚留萬餘人俟夕將遁矣宜速掩之李茂貞信其言遽啓二扉悉衆來

寇時諸軍已介馬待之中軍一鼓百營俱進又分遣數騎以據其圍岐人逆不能駐其趾退不能入其壘殺戮蹂踐不知其數茂貞繇是喪膽但閉壁而已十一月癸卯鄜帥李周彝統兵萬餘入屯于岐之北原與城中舉烽以相應翼日帝以周彝旣離本部鄜時必無守備因命孔勅乘虛襲下之甲寅鄜州平周彝聞之收軍而遁茂貞旣失鄜州之援愕然有瓦解之懼繇是議還警蹕誅闍寺以自贖焉三年正月甲寅岐人啓壁昭宗降使宣問慰勞兼傳密旨尋又命翰林學士韓渥趙國夫人龐顏齋詔押賜帝紫金酒器

御衣玉帶丙辰華州留後李存審遣飛騎來告青州節度使王師範遣牙將張厚輦甲冑弓槊詐言來獻欲盜據州城事覺已擒之矣是日師範又遣其將劉郭盜據兗州丁巳昭宗遣中使押送軍容使韓全誨已下三十餘人首級以示帝甲子昭宗發離鳳翔幸左劔寨權駐蹕帝營帝素服待罪昭宗命學士傳宣免之帝卽入見稱罪拜伏者數四旣而促召升殿密邇御座且曰宗廟社稷是卿再造朕與親屬是卿再生因解所御玉帶面以賜帝亦以至鞍勒馬金器紋錦御饌酒果等躬自拜進焉及翠華東行帝匹馬前導

十餘里宣令止之巳巳昭宗至長安謁太廟御長樂樓禮畢謂帝曰朕生入舊京是卿之力也自古救君之危曾無有如是者况今日再及清廟得親奉觴酒奠於先皇帝室前卿之德朕知不能報矣卽召帝執手聲淚俱發者久之翼日誅宦官第五可範等五百餘人于內侍省三月庚辰制以帝爲守太尉兼中書令宣武宣義天平護國等軍節度使諸道兵馬副元帥加食邑三千戶實封四百戶仍賜回天再造竭忠守正功臣戊戌帝建旆東還昭宗御延熹樓送之旣醉遣內臣賜帝御製楊柳詞五首三月戊午至天梁

時以青州未平命軍士休澣以俟東征四月丙子帝
巡師於臨朐亟命逼其城與青州戰于城下大敗之
是夕淮將王景仁以所部援軍宵遁帝遣揚師厚追
及輔唐殺千人乘勝攻下密州八月戊辰以伐叛之
柄委于楊師厚帝乃東還九月癸卯師厚率大軍與
王師範戰于臨朐青軍大敗殺萬餘人并擒師範弟
既克卯時徙寨以逼其城辛亥偏將劉重霸擒棹州
刺史邵播來獻播師範之謀主也帝命斃之戊午師
範舉城請降青州平異日分命將較畧地於登萊淄
棹等州皆下之繇是東漸至海皆爲梁土也帝復命

師範權知青州軍州事師範乃請以錢二十萬贖
軍帝許之十月辛巳護駕都指揮使朱友倫因擊鞠
墮馬卒于長安節至帝大怒以爲唐室大臣欲謀叛
已致友倫暴死十一月丁酉青將劉鄩舉兗州來降
鄩王師範之將也師範令竊據兗州久之及聞師範
降鄩乃歸命帝以鄩善事其主待之甚優尋署爲元
帥府都押牙權知鄆州留後天祐元年正月己酉帝
發自大梁西赴河中京師聞之爲之震懼是時將議
迎駕東幸洛陽慮唐室大臣異議帝乃密令護駕都
指揮使朱友諒矯昭宗命收宰相崔喬京兆尹鄭元

規等殺之時又邠岐兵士侵逼京畿帝因是上表堅請昭宗幸洛昭宗不得已而從之帝乃率諸道丁匠財力同構洛陽宮不數月而成二月乙亥昭宗駐驛於陝帝自河中來覲謁見行營因灑涕而言曰李茂貞等竊謀禍亂將迫乘輿老臣無狀請陛下東遷爲社稷大計也昭宗延命於寢室見何皇后面賜酒器及衣物何后謂帝曰此後大家大婦委身於全忠矣因歔欷泣下後數日帝開宴於陝之私第請駕臨幸翼日帝辭歸洛陽昭宗開內宴時有宮人與昭宗附耳而語韓建躡帝之足帝遽出以爲圖已因連上章

請車駕幸洛三月丁未昭宗制以帝兼判左右神策及六軍諸衛事是時昭宗累遣中使及內夫人傳宣謂帝曰皇后方在草蓐未任就路欲以十月幸洛帝以陝州小藩非萬乘久留之地時以四月內東幸閏月丁酉昭宗發自陝郡壬寅次于穀水是時昭宗左右唯小黃門及打毬供奉內園小兒共二百餘人帝猶忌之是日密令醫官許昭遠告變乃設饌於別幄召而盡殺之皆坑于幕下先是選二百餘人形貌大小一如內園人物之狀至是使一人擒二人縊於坑所卽蒙其衣及戎具自飾昭宗初不能辨久而方察

自是昭宗左右前後皆梁人矣甲辰車駕至洛都帝與宰相百官導駕入宮乙卯昭宗以帝爲宣武宣義護國忠武四鎮節度使時帝請以鄆州授張全義故有此命五月丙寅昭宗宴羣臣曰朕來御樓前一夜亡失赦書賴梁王收得副本不然誤事宰執不得無過矣是日宴次昭宗入內召帝於內殿曲宴帝不測其事不敢奉詔又曰卿不欲來卽令敬翔入來帝密遣翔出乃止己巳奉辭東歸乙亥至大梁六月帝遣都將朱友裕率師討邠州節度使楊崇本叛故也癸丑帝西征遂朝於洛陽七月甲子昭宗宴帝於文思

殿場乙丑帝發東都壬申至河中八月壬寅昭宗遇弒於大內遺制以輝王祝爲嗣乙巳帝自河中引軍而西癸丑次於永壽邠軍不出九月辛未班師十月癸巳至洛陽詣西內臨於梓宮前畢祇見于嗣君辛丑制以帝至自西征十一月辛酉光州遣使來求援時光州歸款於帝尋爲淮人所攻故來乞師戊寅帝南征度淮次于霍丘大掠盧壽之境淮人乃棄光州而去二年正月庚申進攻壽州壽人堅壁不出丁亥帝自霍丘班師二月辛卯帝至自南征甲午青州節度使王師範至大梁帝待以賓禮尋表授河陽節度

七月辛酉天子賜帝迎鑿紀功碑樹于洛陽庚午遣大將軍楊師厚率前軍討趙凝于襄州辛未帝南征表趙凝罪狀請削奪官爵八月楊師厚進收唐鄧復郢隨均房等七州帝駐軍漢江北自循江干經度濟師之所九月甲子師厚於陰谷江口造梁以濟師趙凝率兵二萬振于江濱師厚麾兵進擊襄人大敗殺萬餘衆乙丑趙凝焚其州率親軍載輕舸沿漢而遁丙寅帝濟江至中流舟壞將沒者數四比及岸舟沉是日入襄城帝因周視府署其帑藏悉空惟於西廡下有一亭窓戶儼然扃鎖甚密遂令破鑰啓扉中有

一大匱緘鑄甚至又令破其匱內有金銀數百錠帝因歎曰亂兵既入公私財貨固無孑遺矣此帑當有陰物主之不令嘗人所得俟我以有之邪遂以百餘錠賜楊師厚襲荊州留後趙明并城上峽奔蜀荆襄二州平帝以都將賀環權領荊州楊師厚權領襄州卽表其事十月丙戌朔天子以帝爲諸道兵馬元帥辛卯帝自襄州引軍由光州路趨淮南將發敬翔切諫請班師以全軍勢帝不聽壬辰次於棗陽遇大雨頗阻師行之勢軍至壽春壽人堅壁清野以待帝帝乃退舍於正陽十一月丙辰大軍北濟帝至汝陰深

悔淮南之行躁撓尤甚丁卯帝至自南征辛巳天子命帝爲相國摠百揆以宣武宣義天子護國天雄武順佑國河陽義武昭義保義昭武定泰寧平盧章國武寧忠義荆南等二十一道爲魏國進封帝爲魏王入朝不趨劔履上殿讚拜不名兼備九錫之命癸未唐中書門下奏中書印已送相國中書公事權用中書省印甲申中書門下奏天下州縣名與相國魏王家諱同者請易之十二月乙酉朔帝讓相國魏王九錫之命丙戌京百司各差官齋本司須知孔目並印赴魏國送納甲午天子以帝堅讓九錫之命乃命宰

相柳璨來使且述揖讓之意焉丁酉帝又讓九錫之命詔畧曰但以鴻名難掩懿實須彰宜且徇於奏陳未便行於典冊又改諸道兵馬元帥爲天下兵馬元帥是時帝以唐朝百官服飾多闕乃製造逐色衣服請朝廷等第賜之其所給俸錢仍請自來年正月全支三年正月幽滄稱兵將寇于魏魏人來乞師且以牙軍驕悍謀欲誅之遣親吏臧延範密告于帝帝陰許之乙丑北征先是帝之愛女適羅氏是月卒於鄴城因以兵伏數千事實於橐中遣客將馬嗣勳領長直軍千人雜以工匠丁夫肩其橐而入于魏聲言爲

帝女以設祭魏人信而不疑庚午夜嗣勳率其衆與羅紹威親軍數百人同攻牙軍遲明盡殺之死者七千餘人泊于嬰孺亦無留者是日帝次于內黃聞之馳騎至魏時魏之大軍方與帝軍同伐滄州聞牙軍之死卽時奔還帝之軍追及歷亭殺賊幾千餘衆乃擁大將史仁遇保于高唐帝遣兵圍之是月天子詔河南尹張全義部署修制相國魏王法物三月甲寅天子命帝摠判鹽鐵度支戶部等三司事帝再上章切讓之乃止四月癸未攻下高唐軍民無少長皆殺之生擒逆首史仁遇以獻命支解之未幾又攻下澶

博貝衛等州皆謂魏軍殘黨所據故也是時晉人圍邢州刺史牛存節堅壁固守帝遣符道昭帥師救之晉人乃遁去五月帝畧地于洛州旣而復入于魏七月己未自魏班師是日收復相州自是魏境悉平壬申帝歸自魏八月甲辰以滄州未平復命北征九月丁卯營于長蘆一夕帝夢白龍附于兩肩左右瞻顧可畏恍然驚悟十月辛巳邠州楊崇本以鳳翔邠寧涇邠秦隴之衆合五六萬來寇屯于美原列十五寨其勢甚盛帝命同州節度使劉知俊都將康懷英帥師禦之知俊等大破邠寇殺二萬餘衆奪馬三千餘

匹擒其列校百餘人楊崇本胡章僅以身免十一月
庚戌康懷英乘勝進軍遂收鄜州十二月乙丑帝以
文武官參官每月一五九日赴朝奏請備廊食詔從
之閏月晉人燕人同攻潞帥丁會舉城降于太原帝
聞之遂自長蘆班師以寨內糗糧山積帝命焚之滄
帥劉守文以城中絕食因致書于帝乞留餘糧以救
饑民帝爲留十餘困以與之四年正月丁亥帝廻自
長蘆次于魏州節度使羅昭威以帝廻軍慮有不測
之患由是供億甚至因密以天人之望切陳之帝雖
拒而不納然心德之壬寅帝至自長蘆甲辰天子遣

御史大夫薛貽矩來傳禪代之意貽矩謁帝陳北面
之禮帝揖之升階貽矩曰殿下功德及人三靈所卜
已定皇帝方議裁詔行舜禹之事臣安敢違旣而拜
伏於砌下帝側躬以避之四月內出傳國寶玉冊受
禪寶及文物儀仗朝于梁國改元開平

冊府元龜

冊府元龜

冊府元龜

冊府元龜

淮南李嗣京參閱

西極文翔鳳訂正

豫章黃國琦較釋

閏位部

七

紹位

年號

紹位

夫易著繼明之義傳有世及之文皆所以紹祖考而保成基也其或叔世艱虞庶邦離析或專制寓內或奄據一隅端委纂戎傳世承祀或正位儲副用禮而

陞或入繼大宗以恩而立或克平多難嗣守家邦或始因顧託潛圖篡奪何嘗不蹈道者逢吉長惡者終凶斯以見天無嘗親民無嘗心鬼神饗於有德億兆歸於至仁者矣

秦二世皇帝胡亥始皇帝之少子

王欽若等曰始皇事迹悉具閏位勳

業門蜀吳以下皆倣此

始皇三十七年十月行出遊會稽并海上北抵瑯琊丞相李斯中軍府令趙高兼行符璽令

事皆從始皇有二十餘子長子扶蘇以數直諫始皇始皇使監兵上郡蒙恬為將唯胡亥愛請從始皇許之餘子莫從

辯上隱姓名遺秦將章邯書曰李斯為秦王死廢上七兄而立今王然則二世

是始皇第十八子也

其年七月始皇帝至沙丘病甚令趙高為

書賜公子扶蘇曰以兵屬蒙恬與喪會咸陽而葬書

已封未授使者書及璽皆在趙高所獨子胡亥丞相

李斯趙高及幸宦者五六人知餘羣臣皆莫知也李

斯以為始皇在外晏駕無真太子故秘之置始皇居

輜輶車中

一作輜車

百官奏事上食如故宦者輒從輜輶

車中可諸奏事趙高因留所賜扶蘇璽書與丞相李

斯謀詐為受始皇詔丞相立子胡亥為太子更為書

賜扶蘇死至咸陽發喪太子立為二世皇帝

子嬰二世之兄子趙高殺二世而立子嬰為秦王

蜀後主禪先王子章武元年立爲太子三年四月先
主殂於永安宮五月後主襲位於成都時年十七
吳廢帝會稽王亮大帝之子赤烏十三年立爲太子
太元二年大帝寢疾大將軍諸葛恪爲太子太傅會
稽太守滕喬爲大葺竝受詔輔太子明年四月帝薨
太子卽尊號

景帝休太帝第六子大元二年封琅琊王居虎林後
徙會稽太平三年九月戊午休從弟大將軍緄以兵
召大臣會宮門黜亮爲會稽王使宗正孫楷與中書
郎董朝迎休十月戊寅及布寨亭武衛將軍孫恩行

丞相率百僚以乘輿法駕迎於永昌亭築宮以武帳
爲便殿止任使孫楷先見恩行楷還休乘輦進羣臣
再拜稱臣休升殿謙不卽御坐正東廂戶曹尚書前
卽階下讚丞相奉璽符休三讓羣臣三請休曰將相
諸侯咸推寡人寡人敢不承受璽符羣臣以次奉引
休就乘輿百官陪位緄以兵千人迎於半野拜於道
側休下車答拜卽日御正殿

後主皓大帝孫廢太子和之子初封烏程侯就國永
安七年七月景帝休殂是時蜀初亡而交趾攜叛國
內震懼貪得長君左典軍荀彧昔爲烏程令與皓相善

稱皓才識明斷是長沙桓王之疇也又加之好學奉遵法度屢言之于丞相濮陽興左將軍張布說休妃太后朱氏欲以皓為嗣朱曰我寡婦人安知社稷之慮苟吳國無隕宗廟有賴可矣於是遂迎立皓時年二十三

宋少帝義符武帝長子永初元年武帝受禪立為皇太子三年五月癸亥武帝晏駕是日太子即皇帝位文帝義隆武帝第三子永初元年封宜都王景平二年五月江州刺史檀道濟楊州刺史王弘入朝乙酉宣太后令廢少帝為榮陽王立義隆令曰宜都王仁

明孝弟著自幼辰德業冲粹識心明允宜纂洪統光臨億兆王者詳依典故以時奉迎未亡人嬰此百罹雖存若殞永悼情事撫心摧塞是日檀道濟入守朝堂六月傅亮率行臺迎義隆於江陵八月丁酉於中堂即皇帝位以徐羨之為司徒傅亮為尚書令時有司奏車駕依舊臨華林園聽訟詔曰政刑多所未悉可先二公推訊元嘉二年羨之與亮上表歸政曰臣聞元首司契運樞成務臣道代終事盡宣翼冕旒之道理絕於上皇拱已之事不行於中古故高宗不言以三齡為斷冢宰聽政以再基為節百王以降罔或

不然陛下聖德紹興負荷洪業億兆顒顒思陶盛化而聖旨謙挹委成羣司自大禮告終鑽燧三改大明竹熒遠邇傾屬臣等雖率誠屢聞未能仰感敢藉品物之情謹因蒼生之志伏願陛下遠存周文日昃之道近思皇室締構之艱時覽萬機躬親朝政廣闢四聰博詢庶業則雍熙可臻有生幸甚帝未許羨之等重曰近陳寫下情言爲心罄奉被還詔覽許未迴豈惟愚臣秉心有在詢之朝野人無異議何者形風四方實繫主德一國之事本之一人雖世代不同時殊風異至於主運臣贊古今一揆未有渾心委任而休

明可期此之非宣布自遐邇臣等荷遇二世休戚以均情爲國至豈容順默重披丹心冒昧以請帝猶辭羨之等又固諫曰此表披陳辭誠俱盡詔旨冲遠未垂聽納三復屏營伏增憂歎臣聞克隆先構幹蠱之盛業昧且不顯帝王之高義自皇宋創運英聖有造殷憂未闕艱患仍纏賴天命有底聖明承業時屯國故猶在民心太山之安未易可保昏明隆替繫在聖躬斯誠周詩夙興之辰殷王待旦之日豈得無爲拱已復玄古之風逡巡虛挹詢匹夫之事伏願以宗廟爲重百姓爲心弘大業以嗣先軌隆聖道以增前烈

愚瞽所獻情盡於此乃許之

孝武皇帝駿文帝第三子元嘉十二年封武陵王累遷都督江州荊州之江夏豫州之西陽晉熙新蔡四郡諸軍事三十年元凶劭弑逆帝率衆入討荊州刺史南譙王義宣雍州刺史臧質並舉義兵四月丙寅次江寧丁卯大將軍江夏王義恭來奔奉表上尊號戊辰至于新亭己巳卽皇帝位改新亭爲中興亭五月甲戌輔國將軍申坦克京城乙亥輔國將軍朱脩之克東府丙申克定京邑劭及始興王濬諸同逆竝伏誅

前廢帝子業武帝長子孝建元年立爲皇太子八年閏五月庚申卽皇帝位年十三以太宰江夏王義恭錄尚書事

明帝或文帝第十一子元嘉二十五年封淮陽王二十九年改封湘東王永光元年出爲豫州刺史都督南豫豫司江西州揚州之宣城諸軍事景和末入朝被留時廢帝疑畏諸父將加禍害帝與腹心阮佃夫李道兒等密謀弑廢帝於後堂升西堂登御座召見諸大臣雖未卽位凡衆事悉稱令書施行十二月丙寅卽皇帝位

後廢帝昱明帝長子泰始二年立爲皇太子泰豫元年四月庚子卽皇帝位

順帝準明帝第三子泰始七年封安成王爲撫軍將軍前廢帝卽位初爲揚州刺史元徽二年加車騎將軍都督揚南豫二州諸軍事四年進號驃騎大將軍開府儀同三司班劍三十五人是年七月戊子夜後廢帝殂奉迎入居朝堂壬辰卽皇帝位

南齊武帝熙太祖長子建元元年立爲皇太子四年三月壬戌卽皇帝位

鬱林王昭業武帝子文惠太子長懋之長子也永明十一年正月長懋薨四月立爲皇太孫居東宮七月戊寅卽皇帝位

海陵王昭文鬱林王弟也永明四年封臨汝公十一年封新安王隆昌元年七月丁酉明帝爲大將軍廢鬱林王立昭文爲帝宣皇太后令曰新安王體自文皇叡哲天秀宜入嗣鴻業永寧四海卽以禮奉迎是日卽皇帝位以明帝爲大將軍錄尚書事

明帝鸞太祖兄始安王道生之子永明十一年七月武帝遺詔爲侍中尚書令隆昌元年加鎮軍大將軍太傅宣城王是年七月廢鬱林王立海陵王十月又

廢之宣皇太后令曰太傅宣城王遺體宣皇鍾慈太祖識冠生民功高造物符表夙著謳頌有在宜入承寶命式寧宗福癸亥卽皇帝位

東昏侯寶卷明帝第二子建武元年立爲皇太子永泰元年七月乙酉卽位

和帝寶融明帝第八子建武元年封隋郡王永元元年改封南康王持節督荆雍益寧梁南北秦七州軍事西中郎將荊州刺史二年十一月甲寅長史蕭穎胄殺輔國將軍巴西梓潼二郡太守劉山陽奉雍州刺史蕭衍舉義兵以衍爲持節都督前鋒諸軍事左

將軍穎胄爲右將軍都督行臺諸軍事十二月壬辰驍騎將軍夏侯亶自京師至江陵稱宣德太后令曰西中郎將南康王宜纂承皇祚光臨億兆方俟清宮未卽大號可且封宣城南郢鄆南東海東陽臨安新安尋陽南郡竟陵宜都十郡爲宣城王相國荊州牧加黃鉞置僚屬選百官西中郎將南康國金如故須軍次返路主者詳依舊典法駕奉迎三年正月建牙于城南二月群僚上尊號立宗廟及南北郊三月乙巳卽皇帝位十二月丙寅雍州刺史王國珍侍中張楞廢東昏侯建康城平封東昏侯爲涪陵王

元帝繹高祖第七子天監十三年封湘東王太清元年為荆州刺史都督荆雍九州諸軍事三年三月侯景寇建業高祖密詔帝為侍中假黃鉞都督中外諸軍事司徒承制徵兵討景是年簡文帝為景立明年改元太寶又明年逼禪於豫章王棟改元天正而帝在江陵只稱太清五年又明年三月王僧辨等平侯景傳其首至江陵十一月丙子即帝位

敬帝方智元帝第九子承聖二年以晉安王出為江州刺史三年十一月江陵為西魏所陷太尉楊州刺史王僧辨司空南徐州刺史陳霸先等定議以帝為太宰承制奉迎還京師四年二月入居朝堂三月北齊遣其上黨王高渙送貞陽侯蕭淵明來主梁嗣至東關吳興太守裴之橫與戰敗績僧辨率眾出屯姑熟七月辛丑僧辨納淵明自採石濟江甲辰入於京師以帝為皇太子九月甲辰霸先舉義襲殺僧辨黜淵明丙午即皇帝位

陳高祖紀云初北齊之請納貞陽也高祖以為不可遣使詣僧辨若爭之反復數四僧辨竟不從高祖居嘗憤歎密謂所親曰武皇雖磐石之宗遠布四海至於克雪讎

恥寧濟艱難惟孝元而已功業之盛前代未聞我與
 王公俱受重寄語未絕音聲猶在耳豈期一旦乃有
 異圖嗣主高祖之孫元皇之子海內屬日天下宅心
 竟有何辜坐致廢黜遠求夷狄假立非次觀其此情
 亦可知矣乃密賜其袍數千領及錦綵金銀以為賞
 賜之具九月壬寅高祖詔徐度侯安都周文育等謀
 之仍部署將士分賞金銀綵帛水陸俱進是夜發南
 徐州討三僧辨甲辰高祖步軍至石頭前遣勇士自
 城北踰入時僧辨方視事外自有兵俄而兵自內出
 僧辨遽走與其第三子鎮相遇俱出閣右尚數十人
 苦戰高祖大兵尋至僧辨眾寡不敵走登城南門樓
 高祖因風縱火僧辨窮迫乃就擒是夜縊僧辨及鎮
 丙午貞陽遜位百寮奉晉安王
 上表勸進十月巳酉晉安即位

後梁宣帝答昭明太子統第三子中大通三年封岳
 陽郡王大同元年出為雍州刺史太清三年高祖以
 答兄江東王譽為湘州刺史徙湘州刺史張讚為雍

州以代答屬侯景寇建業答不受代西魏恭帝元年
 後周太祖輔政令柱國于謹平江陵立答為梁主居
 江陵東城資以江陵一州之地其襄陽所統東歸于
 魏答稱皇帝於其國

孝明帝歸宣帝太子答俎太子嗣位

後王琮明帝歸之子初封東陽王尋立為太子歸俎
 太子嗣位後歸於隋

陳世祖文帝舊高祖兄始興昭烈王之長子永定初
 封臨川郡王三年率兵城南皖是年六月丙午高祖
 遺詔徵入纂位甲寅至自南皖入居中書省皇后令

曰昊天不弔上玄降禍大行皇帝奄捐萬國率土哀號普天如喪窮酷煩冤無所追及諸孤藐爾反國無期須立長主以寧寓縣侍中安東將軍臨川王椿體自景皇屬惟猶子建殊功於牧野敷盛業於戡黎納麓時敘之辰負宸乘機之日竝佐時雍是同草創祧祏所繫遐邇宅心宜奉天宗嗣膺寶籙使七廟有奉兆民寧晏未亡人假延餘息嬰此百罹尋經纏綿興言感絕帝固讓至于再三羣公卿士固請其日卽皇帝位於太極前殿

廢帝伯宗文帝嫡長子永定元年立爲臨川王世子

文帝嗣位立爲皇太子天康元年四月癸酉卽皇帝位於太極前殿詔曰上天降禍大行皇帝奄捐萬國攀號靡及五內摧殞朕以涼德嗣應寶命災災在疚懼其綴旒方賴宰輔救其不逮其令内外文武各復其職遠方悉停奔赴

高宗皇帝頊始興昭烈王第二子文帝嗣位封安城王廢帝光大二年累加大傅領司徒十一月甲寅慈訓太后令降廢帝爲臨海郡王以帝入纂令曰太傅安成王固天生德齊聖廣淵二后鍾心三靈佇眷自前朝不念任摠邦家威惠相宣刑禮兼設指揮嘯叱

湘郢廓清闢地開疆荆益風靡若太戊之承殷曆中
 宗之奉漢嗣較以功名曾何髣髴且地彰玉璽天表
 長星 王欽若等曰是歲五月帝為太傅獻玉璽六月彗星見 布新除舊禎祥成
 顯文皇知子之監事甚帝堯傳弟之懷又符大伯今
 可還申曩志崇立賢君方固宗祧載貞辰象中外宜
 依舊典奉迎輿駕未亡人不幸屬此殷憂不有崇替
 容危社稷何以拜祠高寢歸附武園攬筆潛然兼懷
 悲慶三年正月甲午即皇帝位於太極前殿
 後主叔寶宣帝嫡長子天嘉三年封成安王大建元
 年立為皇太子十四年正月丁巳即皇帝位於太極

前殿

東魏孝靜帝清河王亶世子永熙三年八月孝武帝
 既入關十月大將軍高歡乃與百寮會議推帝以奉
 明帝之後即皇帝位於維城是月東北遷于鄴
 北齊廢帝殷文宣帝長子天保元年立為皇太子十
 年十月癸卯即帝位於晉陽宣德殿
 孝昭帝演字延安文宣母弟也天保元年封嘗山王
 十年十一月廢帝嗣位乃即朝班除太傅錄尚書事
 朝政皆決於帝月餘乃居藩邸自是詔勅多不關帝
 客或言於帝曰鷲鳥捨巢必有探卵之患今日之地

何宜屢出乾明元年從廢帝赴鄴居于領軍府時楊
暗燕子獻爾朱渾天和宋欽道鄭子默等以帝望既
重內懼權逼請以帝爲太師司牧錄尚書事長廣王
湛爲大司馬錄并省尚書事解京畿大都督帝以尊
親而見猜斥乃與長廣王期獵謀之于野三月甲戌
帝初上省旦發領軍府大風暴起壞所御車幔帝甚
惡之及至省朝士咸集坐定酒數行于坐執尚書令
楊愔右僕射燕子獻領軍爾朱渾天和侍中宋欽道
等於座帝戎服與平原王段韶平秦王高歸彥領軍
劉洪徽入自雲龍門於中書省前遇散騎嘗侍鄭子

默又執之同斬于御府之內帝至東閣門都督成任
寧抽刃呵帝帝令高歸彥喻之休寧厲聲大呼不從
歸彥既爲領軍素爲兵士所服悉皆馳仗休寧方歎
息而罷帝入至昭陽殿幼主太皇太后皇太后並出
臨御坐帝奏愔等罪求伏專擅之罪時庭中及兩廊
下衛內二千餘人皆披甲待詔武衛娥永樂武力絕
倫被文宣重遇撫刃思効廢帝性吃訥兼倉卒不知所
言太皇太后又爲皇太后誓言帝無異志唯去逼而
已高歸彥宣勅勞衛士解嚴永樂乃內力而泣帝乃
令歸彥引侍衛之士向華林園以京畿軍入守門閣

斬娥永樂于園詔以帝爲大丞相都督中外諸軍錄尚書事帝尋入晉陽有詔軍國大政咸諮決焉帝旣當大位知無不爲乾明元年八月壬午宣太后令降廢帝爲濟南王是日卽位於晉陽宣德殿

武成帝湛孝昭帝母弟天保元年封長廣王皇建元年爲右丞相孝昭幸晉陽留帝守鄴二年十一月甲辰孝昭詔曰朕嬰此暴疾奄忽無遠令嗣子冲眇未聞政術社稷業重理歸上德右丞長廣王研幾測化體道居宗人雄之望海內瞻仰同胞共氣家國所馮可遣尚書左僕射趙郡王叡喻旨徵王統茲大寶

手書云宜將吾妻子置一好處勿學前人也帝乃自鄴至晉陽宮發喪於崇德殿皇太后令所司宣遺詔左丞相斛律金率百僚敦勸三奏乃許之癸丑卽皇帝位於南宮

後主緯武成帝長子大寧二年立爲皇太子河清四年四月太史奏天文有變其占當有易主丙子乃使太宰段韶兼太尉持節奉皇帝璽綬傳位於皇太子於是羣公上尊號爲太上皇帝軍國大事咸以奏聞初將傳政使內參乘子尚乘驛送詔書于鄴子尚出晉陽城見子騎隨後忽失之子尚未至鄴而其言已布矣

梁末帝瑱太祖第四子開平元年封均王四年出為
 東京馬岷軍都指揮使乾化二年六月三日庶人友
 珪為逆遂即偽位明年改元鳳歷是年二月侍衛親
 軍使袁象先引禁兵誅友珪遣趙巖賫傳國寶至東
 京請帝即位於維揚帝報之曰夷門太祖創業之地
 公等如堅推戴冊禮宜在東京賊平之日即謁維揚
 陵廟是月帝即位於東京乃去鳳曆之號復稱乾化
 三年

年號

自漢武紀元立號而後代因之逮於鼎國以至江左

亦皆建正朔備制度或標瑞應之日或取休美之稱
 或宣紀德化或章明功烈紀年頒曆於是乎在今考
 於舊史洎東魏北齊以及宋梁條次比敘咸可見矣
 蜀先主以後漢建安二十六年四月即皇帝位於成
 都是歲魏黃初三年大赦改元章武是三年
先主猶稱建安四月
 後主以章武三年四月即位改元建興是二年
十年
 延熙元年正月大赦改元是二年
十年
 景耀元年史官言景星見於是大赦改元是六年
年夏
 炎興元年夏大赦改元其年降於晉王欽若等曰自
此以下不書月者皆史闕文
 吳大帝初為吳王以魏黃初三年九月改元黃武是七年

年二月

黃龍元年四月夏口武昌並言黃龍鳳凰見丙申南

郊卽皇帝位大赦改元 盡三年

嘉和元年 黃龍三年十月會稽南始平言嘉禾生十二月丁卯大赦改元盡七年七月

赤鳥元年八月武昌言麒麟見有司奏言麒麟者太

平之應宜改年號詔曰間者赤鳥集於前殿朕親見

若神靈以爲嘉祥者改年宜以赤鳥爲元群臣奏曰

昔武王伐紂有赤鳥之祥君臣觀之遂有天下聖人

書策載述最祥者以爲近事旣嘉親見文明也於是

改元 盡十二年四月

太元元年五月立皇后潘氏大赦改元 盡明年正月

神鳳元年二月大赦改元 盡其年三月

廢帝亮以神鳳元年四月卽位大赦改元建興 盡二年

五鳳元年 建興二年十一月有大鳥五見于春申明年改元盡三年十月

太平元年十一月巳酉大赦改元 盡三年九月

景帝以太平三年九月卽位大赦改元永安 盡七年七月

後主以永安七年七月卽位大赦改元元興 盡其年

甘露元年四月蔣陵言甘露降於是大赦改元 盡二年七月

寶鼎元年八月所在言得大鼎於是大赦改元 盡四年九月

月

建衡元年八月大赦改元

盡三年

鳳凰元年

建衡三年西苑言鳳凰集改元盡三年

天冊元年吳郡言掘地得銀長一尺廣三分刻上有

年月字於是大赦改元

盡其年

天璽元年吳郡言臨平湖自漢末草穢壅塞今更開

通長老相傳此湖塞天下亂此湖開天下平又於湖

邊得石函中有小石青白色長四寸廣二寸餘刻上

作皇帝字於是大赦改元

盡其年

天純元年鄱陽言歷陽山石文理成字又吳興陽羨

山有空石長十餘丈名曰石室所在表為大瑞乃遣

兼司徒董朝兼太宰周處至陽羨縣封禪國山改元

大赦以協石文

盡四年三月降于晉

宋高祖以晉元熙二年六月受禪改元永初

盡三年

少帝以永初三年五月即位明年正月己亥朔大赦

改元景平

盡二年七月

文帝以景平二年七月自宜都王即位大赦改元元

嘉

盡三十年

孝武帝以元嘉三十年四月即位明年正月親祠南

郊大赦改元孝建

盡三年

大明元年正月辛亥朔大赦改元 盡八年

前廢帝以大明八年閏五月即位明年正月乙未朔

大赦天下改元永光 盡其年八月

景和元年八月誅太宰江夏王義恭等改元 盡其年

明帝以景和九年十二月丙寅自湘東王即位大赦

改元泰始 盡七年

泰豫元年正月甲寅朔帝有疾不朝會以疾患未痊

故改元泰豫 盡其年

後廢帝以泰豫元年四月即位明年正月戊寅朔大

赦改元元徽 盡五年七月

順帝以元徽五年七月即位大赦改元昇明 盡三年四月

南齊太祖以宋昇明三年四月受禪大赦改元建元

盡四年二月

世祖武皇帝以建元四年三月即位改元永明 盡十一年

鬱林王以永明十一年七月即位明年正月丁未大

赦改元隆昌 盡其年七月

海陵王以隆昌元年七月即位改元延興 盡其年十月

明年以延興元年十月即位大赦改元建武 盡四年

永泰元年四月甲寅赦三署囚改元 盡其年

東昏侯以永泰元年七月即位明年正月大赦改元

元 盡二年八月

太平元年九月壬寅改元

盡二年十月禪于陳

後梁宣帝以後魏恭帝元后為后周太祖所立居江陵

東城稱皇帝於其國年號大定 盡八年

明帝以大定八年嗣位改元天保 盡二十三年

後主以太子嗣位改元廣運 盡二年歸于隋

陳高祖以梁太平二年十月受禪大赦改元永定 盡三年

年

文帝以永定三年六月即位明年正月癸丑大赦改

元天嘉 盡六年

天康元年三月大赦改元 盡其年

廢帝以天康元年四月癸酉自太子即位明年正月

大赦改元光大 盡二年

宣帝以光大二年十一月自太傅入纂位明年正月甲

午即位改元大建 盡十四年

後主以大建十四年正月即位明年正月壬寅大赦

改元至德 盡四年

禎明元年正月戊寅大赦改元 盡三年正月為隋所滅

東魏孝靜帝以後魏永熙三年十月為高歡所立即

皇帝位於鄴城東北大赦改元天平 盡四年

元象元年正月有巨象自至碭郡陂中南兗州獲送于鄴大赦改元盡其年

興和元年十月癸亥以鄴都新宮成大赦改元盡四年

武定元年正月壬戌朔大赦改元盡八年五月禪于北齊

北齊文宣以東魏武定八年五月受禪南郊禪畢大

赦改元天保盡十年初帝改年識者曰天保之字一大人共十帝其不過十年乎

廢帝以天保十年十月卽位明年正月癸丑朔大赦

改元乾明盡其年八月

孝昭帝以乾明元年八月卽位於晉陽宣德殿大赦

改元皇建盡二年十月

武成帝以皇建二年十一月癸丑卽位于南宮大赦

改元大寧盡二年三月

河清九年四月以河濟清改元盡三年四月

後主以河清四年四月卽位大赦改元天統盡五年

武平元年正月乙酉朔大赦改元盡七年十月

隆化元年十二月丁巳大赦改元盡其年

少帝以隆化二年正月乙亥卽位大赦改元

承光元年在位十八日以後俱奏青州焉後周所滅

梁太祖以唐天祐四年四月受禪改元開平盡五年四月

乾化元年五月甲申朔御朝元殿大赦改元盡六年六月

冊府元龜 閏位部 卷之二百八十八 二十一

末帝以乾化三年二月卽位於大梁五年十一月改

元貞明 盡七年四月先是乾化二年六月庶人友珪弑逆明年正月改元鳳曆是年二月誅友珪

帝復稱乾化至是改焉

龍德元年五月丙戌朔改元 盡三年十月為後唐所滅

冊府元龜

刑府元龜

淮南李嗣京參閱

西極文翔鳳訂正

豫章黃國琦較釋

閏位部 一百八十九

孝德 奉先 尊親

孝德

夫孝德之本也故王者之德莫大於孝上所以寧宗廟下所以教人民導揚徽聲感勵風俗莫加於此焉若乃凌晨問安時刻靡失逾月侍疾衣帶不解躬易

脂澤至於感慟親臨祭享罔不流涕所以雲物變采
井泉湧發蓋天性之所感故明靈之攸答傳示後葉
美莫大焉

宋高祖少時家貧有大志不治廉隅事繼母以孝謹
稱及卽大位春秋已高每旦入朝太后未嘗失時刻
梁高祖生知淳孝年六歲獻皇太后終水漿不入口
三日哭泣哀苦有過成人內外親黨咸皆敬異及丁
文皇帝憂時爲齊王詔議隨府在荆鎮髮髯奉問使
投劍星馳不復寢食倍道就路憤風驚浪不甞停止
高祖形容本壯及還至京都銷毀骨立親表士友不

復識焉望宅奉諱氣絕久之每哭輒嘔血數升服內
不復嘗米唯資大麥日止二溢拜掃山陵涕淚所洒
松草變色及居帝位卽於鍾山造大愛敬寺青溪邊
造智度寺又於臺內立至敬寺殿又立七廟堂月中
再過設淨饌每至展拜茸涕泗滂沱哀動左右
大同十年三月謁建寧陵有紫雲蔭陵上食頃乃散
帝望陵流涕所霑草皆變色陵傍有枯泉至是而流
水香潔辛丑哭于脩陵

簡文帝居穆貴嬪憂哀毀骨立晝夜號泣不絕聲所
坐之席霑濕盡爛

後梁宣帝性不飲酒安於儉素事其母以孝聞
明帝孝悌慈仁有人君之量四時祭享未嘗不悲慕
流涕

北齊孝昭帝性至孝太后不豫出居南宮帝行不正
履容色貶悴衣不解帶殆將四旬殿去南宮五百餘
步鷄鳴而去辰時方還來去徒行不乘輦太后所苦
小增便卽寢伏閣外食飲藥物皆躬親太后嘗心痛
不自堪忍帝立侍帷前以爪掐手心血流出袖友愛
諸弟無君臣之隔

梁太祖性孝愿奉太后未嘗小失色朝夕視膳爲士

君子之規範帝嚴察用法無纖毫假貸太后言之
頗爲省刑

奉先

夫有國家者曷嘗不宗祀以本仁作廟以觀德尊祖
以致孝奉先以盡禮自秦遷周鼎頗遵古制逮於吳
蜀建號江左禪代莫不追加號謚充奉園邑增建廟
貌聿脩時祭親執卣鬯躬謁松楸載籍所記可得而
詳也東魏北齊以及宋梁雖國褊運促日不暇給而
崇薦尊稱肅祇嘗事亦未曾闕焉

秦始皇二十六年初并天下采上古帝位號號曰皇

帝追尊莊襄王為太上皇

二十八年為太極廟

二世元年下詔增始皇寢廟犧牲令羣臣議尊始皇廟羣臣皆頓首言曰古者天子七廟諸侯五大夫三雖萬世世不軼毀今始皇為極廟四海之內皆獻貢職增犧牲禮咸備無以加先王廟或在西雍或在咸陽天子儀當獨奉酌祠始皇廟自襄公已下軼毀所置凡七廟羣臣以禮進祠以尊始皇廟為帝者祖廟蜀先主章武元年四月即皇帝位于成都立宗廟祫祭高皇帝以下

聞松之云先王雖云出自孝景而世數攸遠昭穆難明既紹漢祚不知以

何帝為元祖以立親廟于時英賢作輔儒生在宮宗廟制度必有憲章而載紀闕畧良可恨哉

後主以章武三年五月襲位于成都是月先主梓宮

自永安宮還成都謚曰昭烈皇帝追尊母甘皇后曰

昭烈皇后

吳大帝權黃龍元年四月即皇帝位追尊父破虜將

軍烏程侯堅為武烈皇帝廟曰始祖墓曰高陵母吳

氏為武烈皇后

張紘以破虜有破走董卓扶持漢室之勲討逆平定江東建立大業直有

記頌以昭公美既成吳大帝省讀悲感曰君貪識孤家門閭也

廢帝亮建興元年四月即位上大皇帝尊謚曰大皇帝

墓曰蔣陵五鳳二年十二月作太廟太平元年正月

為太帝立廟稱太祖廟

景帝即位遣使追尊母王夫人曰敬懷皇后改葬敬

陵

後主皓元興元年八月即位謚休曰景皇帝葬定陵

九月追謚父和曰文皇帝

初尊和為昭獻皇帝

改葬

明陵置園邑二百家令承奉守

寶鼎元年十月分吳郡丹陽九縣為吳興郡治烏程

置太守四時奉祠文皇帝廟

二年有司奏言文皇帝宜立廟京邑是年七月使守

大臣薛琬營立寢堂號曰清廟十二月遣守丞相孟

仁太嘗姚信等備官寮中軍步騎二千人以靈輿法

駕東迎神於明陵皓引見仁親拜送于庭

一云此孟仁還皓手

詔日夜相繼奉問神靈起居動止巫覡言見和被服顏色如平生皓悲喜淚涕悉召公卿尚書詣闕門下

賜受靈輿當至使丞相陸凱奉三牲祭於近郊皓於金

城外露宿明日望於東門之外其翌日拜廟薦祭獻

歛悲感又追尊和母王夫人曰大懿皇后

宋高祖初為宋王立廟于彭城祭高祖以下四世

永初元年六月即位追尊皇考為孝皇帝皇妣為穆

皇后七月戊申遷神主于太廟車駕親奉

少帝以永初三年五月即位上武帝謚曰武皇帝廟

號高祖葬初寧陵

九月有司奏武皇帝配南郊武敬皇后配北郊

文帝元嘉元年八月丁酉謁初寧陵還卽位戊午拜

太廟甲辰追尊所生胡婕妤爲皇太后諡曰章皇太

后陵曰熙寧立廟於京師

四年二月乙卯行幸丹徒謁京陵

二十六年二月乙亥車駕陸道幸丹徒謁京陵

二十八年三月拜初寧陵

孝武帝以元嘉三十年四月卽位于新亭崇改太祖

文皇帝號謚初元凶劭弑逆上謚曰景皇帝廟號中

宗至是改焉

五月甲午謁初寧陵

大明二年正月壬戌拜初寧陵

六年正月辛卯宗祀文皇帝于明堂以配上帝

八年正月辛巳宗祀文皇帝于明堂

前廢帝以大明八年閏五月卽位上孝武皇帝尊謚

廟號世祖

九月祔葬文穆皇太后于景寧陵

明帝太始元年十二月卽位乙亥追尊所生沈婕妤

曰宣皇太后陵號崇憲壬午車駕謁太廟

後廢帝以秦豫元年四月卽位上明皇帝尊諡廟號太宗

順帝昇明元年七月壬辰卽位癸卯車駕謁太廟

南齊太祖高皇帝建元元年四月卽位追尊皇考曰

宣帝皇妣爲孝皇后陵曰永安

六月庚辰法駕奉七廟至于太廟

十月巳卯車駕殷祠太廟

武帝以建元四年三月卽位上高皇帝尊諡廟號太

祖

五月庚申以高皇帝配南郊高昭皇后配北郊

永明五年四月庚午車駕殷祠太廟

九月詔太廟四時祭宣皇帝薦麥餅鴨臠孝皇后薦

笋鴨卵脯醬炙白肉高皇帝薦肉膾菹羨昭皇后薦

茗粽炙魚並平生所嗜也

十年十月車駕殷祠太廟

鬱林王以永明十一年七月卽位上武皇帝尊諡廟

號世祖

九月辛酉追尊父文惠太子爲世宗文皇帝

隆昌元年正月戊午車駕拜崇安陵

明帝建武元年十月卽位十一月追謚父始安貞王

道生為景皇妃江氏為懿皇后別立寢廟陵號脩安

四年八月追尊景皇所生王氏為恭太后

帝

東昏侯以永泰元年七月即位上高宗尊諡曰明皇

梁高祖武帝初封梁公立四親廟

天監元年四月即位追尊皇考為文皇帝廟號太祖

皇妣為獻皇后陵號建寧

十一月己未立小廟

十二年六月癸巳新作太廟增基九尺

十五年六月丙申改作小廟畢

大同十年三月甲午輿駕幸蘭陵謁建陵至脩陵壬

寅詔曰朕自違桑梓五十餘載乃眷東顧靡日不思

今四方款關海外有截獄訟稍簡國務小閑始獲展

敬園陵但增感慟帝嘗夢具朝服入太廟拜伏悲感

且於延務殿說所夢何敬容對曰

臣聞孝悌之至通於神明陛下性與天通

故感應斯夢上極然之便有拜陵之議

簡文帝以太清三年五月辛巳即位癸未追尊所生

穆貴嬪為穆皇太后

十一月上武皇帝尊謚廟號高祖陵號脩陵

元帝以承聖元年十一月即位於江陵追尊所生妣

阮脩容為文宣太后

後梁宣帝營大定元年追尊其父統為昭明皇帝廟號高宗統妃蔡氏為昭德皇后

明帝歸以大定八年二月嗣位上宣皇帝尊諡廟號中宗改元天保

元年五月大皇太后龔氏薨諡曰元太后

九月所生母曹太妃薨諡曰孝皇太妃

二年皇太后王氏薨諡曰宣靜皇后

陳高祖武帝永定元年十月即位追尊皇考曰景皇

帝廟號太祖陵曰瑞陵皇妣董太夫人曰安皇后依

梁初園陵故事遷景皇帝神主祔於太廟

四月甲子親祠太廟

文帝以永定三年六月即位上武皇帝尊諡廟號高

祖

大嘉元年六月辛巳改諡皇祖妣景安皇后曰景文

皇后甲午追策故始興昭烈王妃曰孝妃

始興王文帝父也

二年十二月甲申立始興國廟於京師用王者之禮

帝自入嗣而皇考始興昭烈王廟在始興謂之東廟至是徙東廟神主祔于梁之小廟故曰國廟祭用天

子儀

廢帝以天康元年四月即位六月上文皇帝尊諡廟

號顯祖

十月庚申親祠太廟

光大元年十月甲申親祠太廟

二年七月丙午親祠太廟

九月戊午親祠太廟

宣帝大建元年正月甲午即位乙未謁太廟戊午親祠太廟

十月壬午親祠太廟

二年春正月丙午親祠太廟

閏四月戊申謁太廟

十月乙酉親祠太廟

三年十月甲申親祠太廟

四年正月庚午親祠太廟

十月乙酉親祠太廟

五年正月甲午親祠太廟

六年正月壬午親祠太廟

四月甲午親祠太廟

八年四月乙未親祠太廟

東魏孝靜帝以天平元年十月丙寅即位壬申享太廟

四年四月辛未遷七帝神主入新廟

北齊文襄帝初為魏相置王高祖秦州使君王曾祖
太尉武貞公王祖太師文穆公王考相國獻武王比

四廟

文宣帝天保元年五月即位是未追尊皇祖文穆王
為文穆皇帝皇祖妣為文穆皇后皇考獻武王為獻

武皇帝亡兄文襄王為文襄皇帝甲辰遷神主於太

廟

三年正月乙丑有事于太廟

十月丁卯文襄皇帝神主入於太廟

文宣帝受禪置太廟曰皇祖司

空公廟皇祖吏部尚書廟皇祖秦州使君廟皇祖文穆皇帝廟太祖獻武皇帝廟世宗文襄皇帝廟為太

廟獻武已下不毀已上則遞毀並同廟而別室既而

遷神主于太廟文襄文宣並太祖之子文宣初疑其

昭穆之次欲別立廟衆議不同至二年冬始祔太廟

春祠夏禴秋嘗冬蒸皆以孟月并臘凡五祭禘始

梁之制每祭室一太牢始以皇后配祭至河清定

令四時祭廟禘祭及元日廟建並設庭燎三所

廢帝乾明元年二月上文宣皇帝尊諡廟號高祖

孝昭帝皇建二年正月壬子禘于太廟

武成帝太寧元年十一月即位上孝昭皇帝尊諡

河清元年正月壬午享太廟

五月祔葬武明皇后于義平陵

二年正月以武明皇后配祭北郊

後主天統元年十一月巳丑太上皇詔改太祖獻武

皇帝爲神武皇帝廟號高祖獻明皇后爲武明皇后
其文宣謚號委有司議定

十二月庚午有司奏改高祖文宣皇帝爲威宗景烈
皇帝

二年正月癸巳祫祭於太廟

四年十二月上太上皇尊謚曰成皇帝廟號世祖

武平元年十月改威宗景烈皇帝謚號顯宗宣皇帝

梁太祖初爲梁王以唐乾寧二年二月領親軍屯於
單父會寒食帝乃親拜文穆皇帝陵於碭山縣午溝
里

開平元年四月卽位追尊四代廟號高祖嬀州府君
上謚曰宣元皇帝廟號肅祖太廟第一室陵號興極
祖妣高平縣君范氏追謚宣僖皇后皇曾祖宣惠王
上謚曰光獻皇帝廟號敬祖第二室陵號永安祖妣
秦國夫人楊氏追謚光孝皇后皇祖武元王上謚曰
昭武皇帝廟號憲祖第三室陵號光天祖妣吳國夫
人劉氏追謚昭懿皇后皇考文明王上謚曰文穆皇
帝廟號烈祖第四室陵號咸寧皇妣晉國太夫人王
氏追謚文惠皇后

五月甲午詔天下管屬及州縣官名犯廟諱者各宜

改換城門郎改為門局郎

避會祖諱

茂州改為汝州

避烈考諱

桂州慕化縣改為歸化縣潘州茂名縣改為越裳縣

癸卯司天監奏曰辰內有戊字請改為武從之

六月己亥帝御崇元殿內出追尊四廟上謚號玉册

寶共八副宰臣文武百官儀仗鼓吹導引至太廟行

事

三年正月己巳奉遷太廟四室神主赴西京太嘗儀

仗鼓吹導引齊車文武百官奉辭於開明門外甲戌

帝發東都己卯至西都庚寅親享太廟

二月丙午宗正寺請脩興極永安光天咸寧陵竝合

添脩上下宮殿栽植松栢制可癸亥勅豐沛之墓

園所在悽愴動關於情理充奉自繫於國章宜設陵

臺兼升縣望其輝州碭山縣宜升為赤縣仍以本縣

令兼四陵臺令

七月丙寅命宰臣楊涉赴西都以孟秋享太廟

乾化元年十月有司以立冬太廟薦享上言詔丞相

杜曉赴西都攝祭行事

二年正月丙戌有司以孟春太廟薦享上言命丞相

杜曉攝祭行事

末帝即位追尊母賢妃張氏為元貞皇太后祔葬宣

陵

貞明三年十二月幸維揚遂幸伊闕拜宣陵

尊親

夫王者之政不可得而變革者尊尊也親親也所以宣孝熙之德崇教化之本况夫膺餘閏之數富霸王之資當創物之初暨繼明之始莫不采有司之奏稽歷代之典緣禮經之大義傳春秋之深旨尊以懿號崇以宮名昭備物之章極奉親之意誠有國者之要道也雖云角立其可闕諸

蜀後主章武三年五月襲位于成都尊先主皇后曰

皇太后

吳孫皓元興元年八月卽位九月尊母何姬爲昭獻

皇后稱升平宮月餘進爲皇太后

宋高祖永初元年卽位六月尊王太后蕭氏爲皇太

后有司奏曰臣聞道積者慶流德洽者禮備故祇敬

表于崇高嘉號彰於盛典伏惟太后母儀之德於穆

不已保翼之訓光被洪業雖幽明同慶稱謂未窮稽

之前代禮有嘗準宜式遵舊章允副羣望臣等請上

宋王太后號曰皇太后

少帝永初三年五月卽位尊皇太后曰太皇太后

景平元年七月尊所生母張夫人爲皇太后有司奏曰臣聞嚴親敬始所因者本克孝之道繇中被外伏惟夫人德並坤元徽音光紹發祥兆慶誕啓聖明宜崇極徽號永備盛則從春秋母以子貴之義遵漢晉推愛之典謹上尊號爲皇太后宮曰永樂

孝武帝元嘉三十年四月卽位尊所生路淑媛爲皇太后有司奏曰歷集周邦徽音克嗣氣淳漢國沙麓發祥昔在上代業隆祚遠未有不敷陰教以闡洪基膺淑慶以載聖哲者也伏惟淑媛柔明內服徽儀外範含靈初迪則庶熙仰耀弘訓蕃闡則家邦被德民

應惟和神屬推祉故能誕鍾睿躬用集大命固靈根於旣殞融勳烈乎中興載厚化深聲永詠緝宣式諧舊典恭享極號謹奉尊號曰皇太后宮曰崇憲

前廢帝大明八年閏五月卽位崇皇太后曰太皇太后皇后曰皇太后宮曰永訓

明帝泰始元年十二月卽位太皇太后復號崇獻皇太后後廢帝泰豫元年四月卽位七月尊皇后曰皇太后宮曰弘訓崇拜所生陳貴妃爲皇太妃有司奏曰臣聞河龍啓聖理映明神郊電基皇慶燦天地故資敬之道粹古銘風泐貴之誼耿代凝則伏惟貴妃

含和月晷表淑星樞徽音峻古柔光炤世聲華帝掖
軌秀天嬪景發皇明祚昌睿命而備物之章未燠燹
策遠酌前王允陟鴻典臣等參議謹上尊號曰皇太
妃輿服一如晉孝武李太妃故事宮曰弘化

順帝卽位昇平元年崇拜帝所生陳昭華爲皇太后
南齊鬱林王卽位尊母文惠太子妃爲皇太后稱宣
德宮

梁敬帝紹泰元年十月卽位尊所生夏貴妃爲皇太
后

後梁宣帝答爲周太祖所立居江陵東城稱皇帝於

其國尊其所生母龔氏爲皇太后

明帝歸嗣位之元年尊其祖母龔太后曰太皇太后

嫡母王皇后曰皇太后所生母曹貴嬪曰皇太妃

陳文帝永定三年六月卽位七月尊皇后章氏爲皇

太后宮曰慈訓

廢帝天康元年四月卽位五月尊皇太后曰太皇太

后皇后沈氏曰皇太后宮曰安德

後王大建十四年卽位尊皇后柳氏爲皇太后宮曰

弘範

北齊文宣帝天保元年五月卽位尊皇太后婁氏爲

太皇太后宮曰宣訓

廢帝天保十年十月即位尊皇太后為太皇太后皇

后李氏為皇太后

孝昭帝皇建元年八月即位詔奉太皇太后還稱皇

太后皇太后稱文宣皇后

後主天統四年十二月太上皇帝殂上太上皇后尊

號為皇太后

冊府元龜

